

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**Z A K O N  
O IZMJENAMA I DOPUNI ZAKONA O INSPEKCIJAMA  
FEDERACIJE BOSNE I HERCEGOVINE**

**Sarajevo, februar 2020. godine**

## **PRIJEDLOG ZA DONOŠENJE ZAKONA PO SKRAĆENOM POSTUPKU**

Predlažemo donošenje Zakona o izmjenama i dopuni Zakona o inspekcijama Federacije Bosne i Hercegovine po skraćenom postupku, s obzirom da se u konkretnom slučaju ne radi o složenom i obimnom zakonu, te da su u tom smislu ispunjeni uslovi iz člana 172. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09).

Presudom Ustavnog suda Federacije BiH, broj: 1/15 od 13.12.2016. godine („Službene novine Federacije BiH“, broj 19/17), utvrđeno je da su odredbe iz člana 37. i člana 44. stavovi (1) i (3) Zakona o inspekcijama Federacije Bosne i Hercegovine („Službene novine Federacije BiH“, broj 73/14) suprotne odredbama Ustava Federacije Bosne i Hercegovine.

Predstavnički dom Parlamenta Federacije Bosne i Hercegovine je svojim zaključkom broj: 01-02-2240/19 od 05.12.2019. godine, zadužio Vladu Federacije Bosne i Hercegovine da pripremi prijedlog izmjena i dopuna Zakona o inspekcijama Federacije Bosne i Hercegovine, kojim bi se oblast socijalne i dječije zaštite dodijelila u djelokrug rada federalne inspekcije.

**ZAKON  
O IZMJENAMA I DOPUNI ZAKONA O INSPEKCIJAMA  
FEDERACIJE BOSNE I HERCEGOVINE**

**Član 1.**

U Zakonu o inspekcijama Federacije Bosne i Hercegovine („Službene novine Federacije BiH“, broj 73/14), u članu 24. iza tačke 9) dodaju se nove tačke 10) i 11) koje glase:

„10) inspektor za humanitarnu djelatnost,  
11) inspektor za socijalnu i dječiju zaštitu,“

Dosadašnje tačke od 10) do 40) postaju tačke od 12) do 42).

**Član 2.**

Član 37., briše se.

**Član 3.**

Član 44., briše se.

**Član 4.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**O B R A Z L O Ž E N J E**  
**ZAKONA O IZMJENAMA I DOPUNI ZAKONA O INSPEKCIJAMA**  
**FEDERACIJE BOSNE I HERCEGOVINE**

**I. - USTAVNI OSNOV**

Ustavni osnov za donošenje ovog zakona sadržan je u odredbi člana IV. A. 20. (1) d) Ustava Federacije Bosne i Hercegovine, gdje je propisano da Parlament Federacije Bosne i Hercegovine donosi zakone o vršenju funkcija federalne vlasti.

**II. - RAZLOZI ZA DONOŠENJE**

Razlog za pripremu ovog zakona prevashodno je sadržan u nekoliko odlučnih činjenica, i to u donošenju presude Ustavnog suda Federacije BiH broj: 1/15 od 13.12.2016. godine („Službene novine Federacije BiH“, broj 19/17) koja se ovim putem i formalno izvršava te u zaključcima Vlade Federacije BiH V.broj: 643/2019 od 30.05.2019 godine, V.broj: 1161/2019 od 17.10.2019. godine i V.broj: 1328/2019 od 22.11.2019. godine, kao i zaključku Predstavničkog doma Parlamenta Federacije Bosne i Hercegovine broj: 01-02-2240/19 od 05.12.2019. godine.

Gore pomenutom presudom Ustavnog suda Federacije BiH utvrđeno je da su odredbe iz člana 37. i člana 44. stavovi (1) i (3) Zakona o inspekcijama Federacije Bosne i Hercegovine („Službene novine Federacije BiH“, broj 73/14) suprotne odredbama Ustava Federacije Bosne i Hercegovine. S tim u vezi, Vlada Federacije BiH je zaključkom V.broj: 643/2019 od 30.05.2019 godine obavezala nadležne organe federalne vlasti da usklade odredbe predmetnog zakona sa odredbama gore pomenute presude. Osim toga, svojim zaključcima V.broj: 1161/2019 od 17.10.2019. godine i V.broj: 1328/2019 od 22.11.2019. godine, Vlada Federacije BiH je obavezala nadležne organe federalne vlasti da pripreme, radi upućivanja u parlamentarnu proceduru, izmjene i dopune Zakona o inspekcijama Federacije Bosne i Hercegovine na način da se djelokrug rada federalne inspekcije proširi i na oblast rada humanitarnih organizacija te oblast socijalne i dječije zaštite. Na sličan način je i Predstavnički dom Parlamenta Federacije Bosne i Hercegovine svojim zaključkom broj: 01-02-2240/19 od 05.12.2019. godine zadužio Vladu Federacije BiH da pripremi prijedlog izmjena i dopuna Zakona o inspekcijama Federacije Bosne i Hercegovine kojim bi se oblast socijalne i dječije zaštite dodijelila u djelokrug rada federalne inspekcije.

**III. - OBRAZLOŽENJE PRAVNIH RJEŠENJA**

**Odredbom iz člana 1.** se djelokrug rada Federalne uprave za inspekcijske poslove širi i na oblasti rada humanitarnih organizacija te oblast socijalne i dječije zaštite, i to na način da se utvrđuju radna mjesta inspektora za humanitarnu djelatnost i inspektora za socijalnu i dječiju zaštitu.

**Odredbama iz člana 2. i 3.** ukidaju se članovi 37. i 44. postojećeg zakona, a koje je Ustavni sud Federacije BiH gore pomenutom presudom utvrdio kao odredbe koje su suprotne Ustavu Federacije Bosne i Hercegovine.

**Odredbama iz člana 4.** utvrđeno je stupanje na snagu ovog zakona.

#### **IV. – FINANSIJSKA SREDSTVA**

Za provođenje ovog zakona nije potrebno osigurati dodatna novčana sredstva u Budžetu Federacije Bosne i Hercegovine.

**Zakon o inspekcijama Federacije Bosne i Hercegovine  
(„Službene novine Federacije BiH“, broj 73/14)**

**- ODREDBE ZAKONA KOJE SE MIJENJAJU -**

**Član 24.  
(Federalni inspektori)**

U Federalnoj upravi federalni inspektori su:

- 1) tržišno, turističko-ugostiteljski inspektor,
- 2) sanitarni inspektor za nadzor nad sprečavanjem i suzbijanjem zaraznih bolesti,
- 3) sanitarni inspektor za nadzor nad otrovima,
- 4) sanitarni inspektor na carinskim ispostavama,
- 5) inspektor za hranu,
- 6) zdravstveni inspektor,
- 7) farmaceutski inspektor,
- 8) inspektor rada za oblast radnih odnosa,
- 9) inspektor rada za oblast zaštite na radu,
- 10) urbanistički inspektor,
- 11) građevinski inspektor,
- 12) inspektor zaštite okoliša,
- 13) inspektor zaštite prirode,
- 14) inspektor za ceste,
- 15) inspektor za cestovni saobraćaj,
- 16) inspektor za željeznice i željeznički saobraćaj,
- 17) inspektor za sigurnost riječne i pomorske plovidbe,
- 18) inspektor za zrakoplovne objekte i infrastrukturu,
- 19) inspektor za telekomunikacije i poštanski saobraćaj,
- 20) inspektor za nadzor liftova, žičara i cjevovodnog transporta,
- 21) inspektor za podzemne instalacije,
- 22) poljoprivredni inspektor za poljoprivredno zemljište,
- 23) poljoprivredni inspektor za biljnu proizvodnju i zaštitu bilja,
- 24) poljoprivredni inspektor za stočarstvo,
- 25) poljoprivredni inspektor za poticaje u primarnoj poljoprivrednoj proizvodnji,
- 26) poljoprivredni inspektor za sigurnost hrane i prvi stepen prerade primarnih poljoprivrednih proizvoda,
- 27) fitosanitarni inspektor,
- 28) šumarski inspektor,
- 29) šumarski fitosanitarni inspektor,
- 30) inspektor za lovstvo,
- 31) vodni inspektor,
- 32) veterinarski inspektor,
- 33) veterinarski inspektor za hranu,
- 34) veterinarski inspektor za stočnu hranu i lijekove koji se koriste u veterinarstvu,
- 35) inspektor elektro-energetike,
- 36) rudarski inspektor,
- 37) geološki inspektor,
- 38) inspektor posuda pod pritiskom,
- 39) inspektor za kvalitet tečnih naftnih goriva,
- 40) sanitarni granični inspektor.

### **Član 37.**

#### **(Potvrda o uspješnosti u radu - certifikat)**

- 1) Obavljanje inspekcijskih poslova Federalne uprave za inspekcijske poslove podložno je provjeri o uspješnosti u radu (izdavanje certifikata).
- 2) Pod provjerom iz stava 1) podrazumijeva se ocjenjivanje kvaliteta rada glavnog federalnog inspektora i inspektora na osnovu primjene utvrđenih standarda za državne službenike koji rade u Upravi za inspekcijske poslove.
- 3) Potvrda o uspješnosti u radu (u daljnjem tekstu: certifikat) izdaje se za period od četiri godine, a odnosi se na kvalitet rada i uspješnosti u radu glavnog federalnog inspektora i federalnih inspektora.
- 4) Certifikat se izdaje glavnom federalnom inspektorima i federalnim inspektorima ako su proveli na radu najmanje jednu godinu na poslovima u Upravi.
- 5) Detaljni uslovi o načinu dobijanja i gubljenja certifikata, vremenu trajanja, javnom objavljivanju imena inspektora koji su dobili certifikat, izradi i načinu utvrđivanja standarda za dobijanje certifikata regulirat će se aktom koji donosi Vlada Federacije na prijedlog direktora Uprave uz saglasnost federalnog ministra pravde.
- 6) Ako glavni inspektor i inspektor ne budu certificirani, imaju obavezu istekom roka šest mjeseci pristupe ponovnoj provjeri radi dobijanja certifikata.
- 7) Ako glavni inspektor i inspektor na ponovnoj provjeri ne bude certificiran u narednom periodu od šest mjeseci određuje mu se mentor radi stručne pomoći na pripremanju za dobijanje certifikata i umanjuje mu se neto plaća za iznos od 30% rješenjem direktora.
- 8) Ako glavni inspektor i inspektor ne bude certificiran ni nakon treće provjere, gubi status i prestaje mu radni odnos.

### **Član 44.**

#### **(Odlučivanje o suspenziji inspektora)**

- 1) O suspenziji glavnog inspektora i inspektora direktor donosi rješenje.
- 2) Protiv rješenja iz stava 1) ovog člana ima se pravo uložiti žalbu u skladu sa Zakonom o državnoj službi.
- 3) Žalba na rješenje iz stava 2) ovog člana ne odlaže izvršenje rješenja.